



Republika e Kosovës

Komuna e Drenasit

Kuvendi i Komunës



02 Nr. 060/04-9373 dt. 11/03/ 2026

## PROCESVERBALI

**I mbledhjes së Komitetit për Politikë dhe Financa, mbajtur më 18.02.2026, e cila filloi në orën 10:00.**

**Mbledhjen e kryesoi:** Burim Bujupi – kryesues.

**Kryesuesi i Kuvendit Burim Bujupi,** deklaroi të hapura punimet e mbledhjes së Komitetit për Politikë dhe Financa.

**Në mbledhje morën pjesë:** Anëtarët e Komitetit për Politikë dhe Financa, Fitore Morina – Hoxha (PDKRLL), Selman Çallapeku (PDKRLL), Pajtime Berisha (PDK), Arigon Sinani (PDK), Egzona Tërdevci (VV) Arbër Halilaj (GREEN).

**Të pranishëm ishin edhe:** Kryetari i Komunës Ramiz Lladrovci, nënkryetari Arben Shala. Drejtori i Drejtorisë së Shërbimeve Publike dhe Emergjencave Nexhmedin Gruda, drejtoresha e Drejtorisë së Administratës Laureta Thaqi.

Mbledhja do të këtë

### Rend dite:

1. **Plani i punës së KKSB-së për vitin 2026;**
2. **Propozim-vendim për miratimin e Planit Lokal të Veprimit në Mjedis 2025-2029;**
3. **Propozim-vendim për miratimin e Planit Lokal për Strategjinë e Cilësisë së Ajrit, Komuna e Drenasit 2025-2029;**
4. **Miratimi i raportit përfundimtar të komisionit për vlerësimin e dëmeve nga fatkeqësitë natyrore dhe fatkeqësitë e tjera;**

5. **Propozim-vendim për formimin e komisionit për shqyrtimin e kërkesave dhe ankesave të palëve për emërtimin e rrugëve, rrugicave dhe vendeve të tjera publike në Komunën e Drenasit;**
6. **Propozim-vendim për miratimin paraprak të vendimit për dhënien e pronave të paluajtshme të Komunës së Drenasit (Gllgocit) në shfrytëzim afatgjatë personave fizik-juridik (për 99 vjete);**
7. **Të ndryshme.**

**Kryesuesi i Kuvendit Komunal, Burim Bujupi**, pasi përshëndeti të pranishmit, kryesuesi deklaroi të hapura punimet e mbledhjes së Komitetit për Politikë dhe Financa.

**Egzona Tërdevci**, tha se ne nuk kemi pranuar asnjë material për pikën katër. E di që materiali ka shumë dinamikë dhe nuk është përfunduar ende, por kisha propozuar që kjo të mbetet për një mbledhje tjetër, pasi duke qenë se nuk kemi pranuar asnjë material, nuk kemi se çfarë të diskutojmë.

**Drejtori i Drejtorisë së Shërbimeve Publike dhe Emergjencave, Nexhmedin Gruda**, tha se po është e vërtetë që ende nuk është bërë një raport përfundimtar, po besoj që deri nesër do të jetë i gatshëm raporti përfundimtar.

**Kryetari i Komunës, Ramiz Lladrovci**, keni plotësisht të drejtë që materialet duhet të jenë të kompletuara. Është një material voluminoz me raporte, të cilat edhe gjatë vërshimeve kam kërkuar që komisionet tona t'i dërgojnë në ministritë përkatëse anëtarët e komisioneve të veta. Ky është një proces të cilin Qeveria na ka detyruar ta kalojmë përmes Kuvendit këto dy-tri vitet e fundit. Ju do të votoni një raport, të cilit askush nuk mund t'i bëjë analizë, as raport për vlerat që i kanë caktuar ndonjë dëmi nga vërshimet.

Prandaj, është neglizhencë e Qeverisë vonesa e procedurave për subvencionimin e qytetarëve. Në këtë komitet debatohen pikat e rendit të ditës dhe pastaj rekomandohen për seancë në Kuvend, pra këtu nuk merret asnjë vendim.

**Kryesuesi i Kuvendit Komunal, Burim Bujupi**, hodhi në votim këtë rend dite. Ky rend dite rekomandohet për Kuvend. **Për votuan 3, abstenime 2 dhe kundër 2.**

**Kryesuesi i Kuvendit Komunal, Burim Bujupi**, hapi për diskutim pikën 1: Plani i punës së KKSB-së për vitin 2026. Pasi nuk pati diskutim për pikën e parë të rendit të ditës, ajo u rekomandua për Kuvend në mënyrë unanime.

**Kryesuesi i Kuvendit Komunal, Burim Bujupi**, hapi për diskutim pikën 2: Propozim-vendim për miratimin e Planit Lokal të Veprimit në Mjedis 2025–2029.

**Egzona Tërdevci**, tha se kam vërejtur që MAPL-ja e ka kthyer pasi mungon harta topografike. Përsëri, në dokumentin që na është përcjellë, nuk është harta. Kjo do të mund të përmirësohej për seancë që të mos kthehej prapë vendimi. Të pjesa e financave, unë besoj që nuk janë caktuar mirë burimet financiare dhe të pjesa e caktimit të afateve, prapë mendoj që ka mangësi.

**Kryesuesi i Kuvendit Komunal, Burim Bujupi**, tha se me vërejtjet që i ceki Egzona Tërdevci, pika e dytë e rendit të ditës u rekomandua për Kuvend. **Për votuan 7, abstenime 0, kundër 0.**

**Kryesuesi i Kuvendit Komunal, Burim Bujupi**, hapi për diskutim pikën 3: Propozim-vendim për miratimin e Planit Lokal për Strategjinë e Cilësisë së Ajrit, Komuna e Drenasit 2025–2029. Pasi nuk pati diskutim për pikën e tretë të rendit të ditës, ajo u rekomandua për Kuvend në mënyrë unanime.

**Kryesuesi i Kuvendit Komunal, Burim Bujupi**, hapi për diskutim pikën 4: Miratimi i raportit përfundimtar të komisionit për vlerësimin e dëmeve nga fatkeqësitë natyrore dhe fatkeqësitë tjera.

**Drejtori i Drejtorisë së Shërbimeve Publike dhe Emergjencave, Nexhmedin Gruda**, tha se të premten, më 12.02.2026, jam takuar me komisionin për vlerësimin e dëmeve dhe kam kërkuar që të punohet në mënyrë sa më transparente, pasi materiali do të dalë edhe në Kuvend dhe qytetarët mund të shohin se si është bërë vlerësimi i tyre.

Ata i kanë cekur disa nga vështirësitë, si të vlerësimi i veturave të cilat janë nga komunat e tjera dhe kanë ngecur në komunën tonë, ku po hasin vështirësi.

**Egzona Tërdevci**, theksoj se a janë përfshirë këtu vetëm dëmet që u janë bërë ekonomive familjare dhe bizneseve, apo janë edhe dëmet në infrastrukturë. Sepse, sa kam folur me drejtorin e Infrastrukturës, ka thënë që një komision qeveritar është marrë me dëmet në infrastrukturën publike.

**Drejtori i Drejtorisë së Shërbimeve Publike dhe Emergjencave, Nexhmedin Gruda**, tha se vlera që dhashë unë është për dëmet në ekonomitë familjare, dëmet në biznese, ato bujqësore dhe për vetura, ndërsa për dëmet në infrastrukturën publike është tjetër raport dhe tjetër komision dhe ai nuk vjen në Kuvend, por shkon drejtpërdrejt në Ministri.

**Kryesuesi i Kuvendit Komunal, Burim Bujupi**, pas sqarimit të drejtorit Gruda, e hedh në votim pikën 4: Miratimi i raportit përfundimtar të komisionit për vlerësimin e dëmeve nga fatkeqësitë natyrore dhe fatkeqësitë e tjera. **Për votuan 4, abstenime 3, kundër 0.**

**Kryesuesi i Kuvendit Komunal, Burim Bujupi**, hapi për diskutim pikën 5: Propozim-vendim për formimin e komisionit për shqyrtimin e kërkesave dhe ankesave të palëve për emërtimin e rrugëve, rrugicave dhe vendeve të tjera publike në Komunën e Drenasit. Unë kisha propozuar të formonim një komision që nuk e neglizhon punën, sepse ka kërkesa që janë bërë që nga viti 2017 dhe deri tani, në vitin 2026, nuk është emërtuar asnjë rrugë.

**Arbër Halilaj**, tha se pa marrë parasysh rëndësinë e komisionit, mendoj që kjo pikë të rekomandohet për Kuvend, ndërsa Kuvendi t'i zgjedhë anëtarët për këtë komision.

**Kryesuesi i Kuvendit Komunal, Burim Bujupi**, e rekomandon për Kuvend pikën 5: Propozim-vendim për formimin e komisionit për shqyrtimin e kërkesave dhe ankesave të palëve për emërtimin e rrugëve, rrugicave dhe vendeve të tjera publike në Komunën e Drenasit. **Për votuan 7, abstenime 0, kundër 0.**

**Kryesuesi i Kuvendit Komunal, Burim Bujupi,** hapi për diskutim pikën 6: Propozim-vendim për miratimin paraprak të vendimit për dhënien e pronave të paluajtshme të Komunës së Drenasit (Glllogocit) në shfrytëzim afatgjatë personave fizik-juridik (për 99 vjet).

**Egzona Tërdevci,** meqenëse është kryetari, kam disa pyetje që i kam bërë edhe në seancë. Të parcela 13-0 në Glllobar, shihet se kjo pronë është parking të pishat. Pra, a mund të ma shpjegoni cila është logjika që t'u jepet në shfrytëzim personave fizik - juridik për 99 vjet parkingu të parku i vetëm që kanë qytetarët e Drenasit. Ngastra kadastrale 2652-4 në Arllat bllokun rrugën "Heli Bujupi" që të dërgon të disa shtëpi në Arllat.

Ngastra 126-2, që është ngjitur me parcelën ku janë zjarrfikësit, do të duhej të lihej e lirë që në të ardhmen, kur të rriten kapacitetet, të mund të shfrytëzohej nga zjarrfikësit e jo t'i jepet dikujt në shfrytëzim për 99 vjet. Po ashtu, cila pjesë konkretisht e ngastrës 716-2 në Korroticë të Poshtme do të jepet, sepse në atë ngastër ka rrugë që bllokohen nëse jepet. E kam të qartë që nuk do të jepet e gjithë ngastra, por nëse mundeni të na shpjegoni saktësisht se cila pjesë do të jepet.

**Kryetari i Komunës, Ramiz Lladrovci,** tha se jemi duke votuar një listë paraprake. Nuk mundemi asnjë pronë ta nxjerrim në shpallje publike për ofertues pa e kaluar në Kuvend. Pastaj bëhet komisioni që bën shpalljen, gjithmonë kur kemi shumë konkurrentë, pranohen ankesat, vjen rekomandimi e pastaj vjen votimi. Pra, një listë e pronave paraprake është detyrim ligjor për të dërguar në Kuvend.

Besoj që keni për të pasur përgjigje të shumta nga unë në Kuvend dhe kam për të mbrojtur çdo debat, i cili do të ketë arsyeshmëri të mjaftueshme për të gjithë ata që kanë debatuar dhe kanë mendu që e kanë ndal një pikë të rendit të ditës dhe i kanë shpëtuar pronat, pa iu dhënë investitorëve dhe i keni lënë qytetarët pa zhvillim ekonomik e pa punësim.

Ti edhe Arbëri e dini që unë kam kërku të ketë një komision nga një anëtar prej çdo grupi politik në komunë, për t'i bërë vlerësimet dhe për të m'i sjellë mua si propozim që unë t'i aprovoj ato prona. Transparencë më të madhe se kjo, ku ju i caktoni anëtarët e Kuvendit në komision që bëjnë vlerësimin se kujt t'ia japin një pronë, nuk e di ku ka. A jep prona a nuk jep, Kuvendi i Komunës është përgjegjësi e juaja, jo e imja, por e imja është me i tregu qytetarit se kush po e pengon zhvillimin e Komunës tonë.

**Egzona Tërdevci,** po cila është ideja së pse janë caktuar për 99 vjet dhe jo 20 ose 30, rishikojeni vendimin, sepse edhe arsyetimin e sillni shumë shabllon për të gjitha pronat.

**Kryetari i Komunës, Ramiz Lladrovci,** bëri të ditur se një qytetar apo një investitor, i cili dëshiron të marrë një pronë në shfrytëzim, e vlerëson vetë se për sa vite po kërkon ta marrë atë: 20, 35 apo 40 vjet – varet si dëshiron ai. Ne nuk kemi të drejtë ta kufizojmë, por duhet ta llogaritni që këto prona nuk jepen me vazhdim, nëse e ke dhënë për dhjetë vjet, ajo i kthehet Komunës dhe procesi përfundon. Pronës i është rritur vlera dhe kur t'i rritet vlera, ne e shpallim prapë në shfrytëzim me vlerë të rritur. Këto janë gabime teknike që i kanë bërë zyrtarët e mi apo të administratës. Nuk e kam bërë listën unë dhe, për besë, nuk e kam shiku nëse është për 99 vjet apo "deri në" 99 vjet. Por do t'i përmirësojmë. Për çdo pronë do ta japim arsyetimin në monitor dhe do të flasim për secilën veç e veç. Nuk do të ketë më abuzim me pronën publike.

**Arbër Halilaj**, kjo është pikë e rëndësishme, sepse ka të bëjë me zhvillimin ekonomik të Komunës dhe çështjeve të tjera që ndërliken. Është diskutuar e politizuar shumë për këtë çështje, gjë që nuk do të duhej të ndodhte, pasi çdo pronë publike mund të jepet vetëm nga asambleja. Unë mendoj se procedurat, ashtu siç janë dhënë përpara, kanë bërë që të rritet interesi për këtë çështje. Në këtë rast, i kisha propozuar Kryetarit ose përpiluesit të listës së pronave që të tregojnë transparencë dhe llogaridhënie para qytetarëve lidhur me rëndësinë e dhënies së pronave në shfrytëzim. Bashkë me listën, duhet të jetë edhe sqarimi i interesit publik dhe punësimi i komunitetit që graviton rreth asaj prone. Pasi ne nuk e dimë se kush oferton, në bazë të destinimit të pronës mund të japim një sqarim se çfarë përfiton komuniteti dhe cilat janë synimet e komunës sa i përket rritjes së vlerës. Ashtu siç tha edhe Egzona, nuk duhet të ketë vetëm një arsyetim shabllon për të gjitha pronat - arsyetim të cilin mund ta marrim edhe nga ligji për dhënien e pronave në shfrytëzim. Kur kemi një sqarim adekuat për secilën pronë, i vëmë asambleistët para përgjegjësisë, nëse për një pronë është sqaruar se çfarë përfitimi sjell, atëherë pyetja është – pse nuk po e voton.

**Kryetari i Komunës, Ramiz Lladrovci**, për dy pronat në Gllobar, të cilat i shfrytëzojnë jashtëligjshëm, unë po të mos doja t'jua ofroja juve shqyrtim dhe po të mos i shpallja unë, pa drejtën tuaj mundem vetëm të shkoj t'i marr, t'u vendos shiritat dhe t'ia kthej rrethojnë shkollës. Asnjë në këtë botë, as ai që është aty brënda, nuk ka çfarë të bëjë, sepse ligji ma lejon. Kemi prona edhe në Komoran, të cilave u ka skaduar afati, dhe i kam udhëzuar zyrtarët e mi që të marrin masa. Ju duhet me e kuptu që kryetari nuk i jep pronat, kryetari i nënshkruan ato të cilat i voton Kuvendi. Por mos me e kalu listën paraprake që e kemi obligim për Grantin e Performancës, këtë nuk e arsyetoj. E kalojmë listën, pastaj diskutojmë për pronat veç e veç, p.sh. Këtë pronë nuk po duam me e dhënë në shfrytëzim, diskutojmë dhe vendos Kuvendi, një pronë tjetër po duam, edhe atëherë ne e bëjmë, kush i fiton poentat, e bëjmë përqindjen për të punësuar, për qira, për investim.

Asnjë asamblist nuk mundet me dalë e me thënë që i kam thënë me i votu pronat, duke përfshirë edhe këta të grupit tim. Kjo është që unë nuk bëj pazare me askënd për pronë komunale, kjo është në dorën tuaj, doni me e votu, e votoni. Vetëm qytetari ka me pasë informacionin se kush po i pengon dhënien e pronave në shfrytëzim. Dhe ka mundësi që t'i sjell në Kuvend edhe ato që i kemi pasur përpara, sepse po bëjnë kërkesa, unë jam i detyruar me i dërguar për energji, ato një herë i keni kalu në Kuvend, ato janë me negocim.

**Kryesuesi i Kuvendit Komunal, Burim Bujupi**, Kryetar, me sa e kuptova Arbërin dhe juve, keni thënë se ditën kur ta kemi seancën në Kuvend, do të merrni një projektor dhe për secilën pronë do ta sqaroni e do ta shpjegoni veç e veç.

**Kryetari i Komunës, Ramiz Lladrovci**, do të bëjmë përpjekje për këtë gjë.

**Kryesuesi i Kuvendit Komunal, Burim Bujupi**, sipas fjalëve të Arbërit, është krijuar njëfarë kauze që kushdo që voton për pronat, ka një 'pazar' mbrapa. Prandaj, frika e secilit koleg asamblist për të votuar për ose kundër është se i ikën atij ndëshkimi (publik). Sepse, në qoftë se Arbëri e ka kundërshtuar një herë dhënien e pronave dhe tashmë e voton, i bie që paska përfituar diçka, pasi është krijuar kjo kauzë e rrejshme.

**Kryesuesi i Kuvendit Komunal Burim Bujupi**, hodhi në votim pikën 6. Propozim-vendim për miratimin paraprak të vendimit për dhënien e pronave të paluajjtshme të Komunës së Glllogocit në shfrytëzim afatgjatë personave fizik-juridik (deri 99 vjte), ky rekomandim nuk kalon për në Kuvend. **Për votuan 3, Abstenim 0, Kundër 4.**

**Kryesuesi i Kuvendit Komunal Burim Bujupi**, hapi për diskutim pikën 7. **Të ndryshme.**

**Egzona Tërdeveci**, tha se në seancën e kaluar e patëm raportin financiar dhe unë kam marrë të dhëna shtesë prej drejtorit për projektet që janë prekur prej përmbaruesve. A mundem me pasë një raportim për projektet kapitale që janë realizuar në vitin 2025, Domethënë, cilat janë kryer me sukses, cilat kanë ngecur edhe arsyet pse kanë ngecur. Jemi asambleistë dhe nuk ka asgjë të keqë me diskutuar, që me i ditë edhe publiku.

**Kryetari i Komunës, Ramiz Lladrovci**, tha se në mbledhjen e kaluar më keni akuzuar që jam larguar prej mbledhjes. Unë asnjëherë nuk jam larguar prej mbledhjes. Ju e dini që keni qenë asambleist edhe më herët dhe të pika të ndryshme kam qëndru dhe nuk jam largu.

**Pajtime Berisha**, tha se e kam një shqetësim për varrezat e Poklekut, të cilat janë në gjendje të mjerueshme dhe kjo krijon një pamje që nuk i ka hije një vendi të shenjtë. Rruga që të dergon të varrezat është vështirë për t'u kaluar, sidomos gjatë stinës me reshje familjarët përballen me baltë vështirësi në qasje dhe kushte jo të përshtatshme, sa herë që shkojnë për t'i vizituar më të dashurit e tyre. Përreth varrezave ka deponi ilegale të mbeturinave, gjë që e rëndon edhe më shumë situatën. Kjo është e papranueshme, nuk mund të lejojmë që një vend i shenjtë të shndërrohet në zonë të ndotur dhe pa kontroll.

Prandaj, kërkoj nga ekzekutivi komunal që të planifikohen dhe të realizohen sa më shpejt rrethimi i varrezave në Poklek të Ri dhe Vasilevë. Kam edhe një çështje tjetër të rëndësishme që lidhet me sigurinë e nxënësve, bëhet fjalë për mungesën e trotuareve nga fshati Poklek i Vjetër të shkolla fillore 'Fazli Grajçevci'. Nuk ka trotuar funksional as nga lagjet e Vasilevës deri të e njëjta shkollë. Nxënësit detyrohen të ecin buzë rrugëve, gjatë dimrit dhe reshjeve qarkullimi bëhet edhe më i rrezikshëm.

Siguria e tyre është prioritet absolut për komunën, prandaj kërkoj, projektimin dhe ndërtimin urgjent të trotuareve në këto segmente, vendosjen e sinjalizimit horizontal dhe vertikal pranë shkollës, si dhe përfshirjen e këtyre prioriteteve në planifikimin buxhetor. Nëse flasim për zhvillim dhe mirëqenie, duhet të fillojmë nga gjërat bazike, respekti për varrezat, infrastruktura funksionale dhe siguria për fëmijët tanë. Këto nuk janë kërkesa politike, janë kërkesa legjitime të banorëve të Poklekut dhe të Vasilevës.

**Kryetari i Komunës, Ramiz Lladrovci**, tha se ka projekte të cilat nuk kanë përfunduar dhe ajo rrugë nuk ka përfunduar sepse është pjesë e procesit të stadiumit, ende nuk e kemi përfunduar. Shkollës fillore ia kemi hapur hyrjen kah stadiumi, që mos të përzihen nxënësit me të rriturit. Të dyja shkollat e kemi shenjë. Jam dakord që duhet me pasë shenjë që tregon se është shkolla, por unë besoj që të gjithë ata që e frekuentojnë atë rrugë e dinë që janë tri (3) shkolla aty dhe nuk ka zhvillim të shpejtësisë së madhe. Ne kemi ankesa edhe në rrugën kah Kroni i Mbretit, prej Korrotice, që nuk janë vendos shenjat. Prej vitit 2012 ka filluar ai projekt, u dha tenderi pa u shpallur prona interes i përgjithshëm.

Dhjetëfish kam paguar unë për pronën e cila u shpall interes i përgjithshëm tek pasi kam ardhur unë në pushtet. Pasi e kanë hapur trasenë, i ka kushtuar komunës, sepse Ministria, në vend që t'ia vlerësonte pronën 250 euro, kur është bërë vlerësimi, ia ka vlerësuar 3000 euro. E kanë çuar në gjykatë dhe kur kemi pyetur pse e keni bërë këtë veprim, ata kanë thënë që t'i e ke bërë trasenë dhe ia ke rritur vlerën. Gabimet të cilat duhet t'i ndjekin edhe mua nesër kur nuk jam kryetar, duhet t'i ndjekin edhe ata që kanë qenë para meje e që i kanë bërë.

Ne nuk mundemi me vendosë tabela në një projekt i cili nuk është përfunduar. A duhet ta mbajmë rrugën mbyllur-jo, rrugën mbyllur nuk mundemi ta mbajmë sepse është e qarkullueshme, por çdokush që e ka marrë patentë shoferin e di se, nëse nuk ka tabela, me sa km/h duhet të vozisë brenda një zone të caktuar urbane.


Në katër vende kemi varreza në Poklek. Ne e kemi dhënë atë pronë për varreza, po ashtu edhe në Korroticë, në arat e shtetit që kanë qenë përpara.

Por, duhet të definohet njëherë prona se sa janë varrezat, sepse kemi marrë ankesa prej qytetarëve që po hidhen mbeturina, por kemi me marrë masa. Shumicën e varrezave në komunën tonë i kemi rrethuar, e rëndësishme është mos me i leju kafshët me hyrë dhe mos me hedh mbeturina. Ndërsa, për ta asfaltuar rrugën deri të varrezat, nuk i kemi mundësitë buxhetore. Kemi bërë kërkesë urgjente për "Urën e Shtrubullovs", a kanë me e trajtu apo s'kanë me e trajtu, nuk e dimë.

**Kryesuesi i Kuvendit Komunal, Burim Bujupi**, tha se pasi nuk pati diskutime të tjera, e konsiderojmë të mbyllur mbledhjen.

**Mbledhja përfundoi në ora 11:30.**

**Procesmbajtëse:**



**Fakete Hoti**



**Kryesuesi i Kuvendit komunal Drenas**

**Burim Bujupi**

**Lekturoi**



**Nikelinda Bujupi**